


■ LANT ATOR

» DI ENZO DRIUSSI

# Cjâr professôr Petracco



**CENTENARI DE NASSITE.** Di un grum di cjartis, cchartutis, giornai che taponin el plan de scrivanie là che o passi el temp leint une vore e scrivint un pôc, mi è capitât in man un sfuei ch'al fevelave de nassite de Universitât dal Friûl. Naturalmentri si ricuardave ancie le figure di chel ch'al ven ricognossût come un dai paris di che istituzion, el professôr **Tarcisio Petracco**. Chest an al cole el centenari di quand ch'a l'è nassût, a San Zôrz de Richinveld, tal 1910, apont.

Ancje jo, come tanc', o ài vuode furtune di vêlu vût come insegnant. Al jere l'unic che, a no students, nus dave dal "lui". Un grand

mestri di scuele e di vite. Cun lui al jere un plasè studiâ ancie par vie che, a flanc des materiis ch'al insegnave, nus contave, a voltis, de

so vite grame e sufiarte. O vin imparât, in chei ains, a cognossi sorelut el "omp" Petracco che, ancmò zovin, a l'à piardût prime le mari e po el pari. Un omp che par studiâ l'à fat cent mistîrs rivant a deventâ mestri, podopo madûr al liceu classic e ae fin professôr in Letaris e filosofie. Nus à contât de so vite di emigrant e de so passion pe Grecie che, ogni an, al visitave. Par tanc' ains dopo finide scuele fin a pôc temp prime che nus lassâs, lu ciatavi dispès atôr par Udin. Co si incrosavin si fermave a tabajâ, a domandami dal gno lavôr, des mês puisiis. M'impensi che une dì no

l'è rivât a scuele. Par no une liberazion par vie che ta chêz dôs oris al veve proviodût el compit di latin. Un compit che però vin fat d'istès cun tun suplent che nus à dât notizie che el professôr, par judâ une siore restade siarade fûr di cjase, al jere colât de terace dal second plan dal condomini, fasins un grum di mál. Qualchi zornade dopo, cun **Guido Crainz**, compain di classe, o soi lât a ciatâlu ta l'ospedâl. Dut ingessât come Crîst in crôs, pene che mi à jodût, savint che, a differenze di Crainz, no jeri un canon in latin, mi à dit, cun tun fil di vôs: "Driussi, quando hai preso nel compito?" O vevi cjapât un misar sîs meno meno, ma a lui, sperant di fâlu content, j'ài dit ch'o vevi cjapât siet. No savarai mai se mi à crodût.